

ՀՀ ՎԱՐՉԱԿԱՆ ԴԱՏԱՐԱՆԻՆ

Գյումրու նստավայր, ք. Գյումրի, Անկախության
հրապարակ 7. հեռախոս՝ 0312-5-70-98

Հայցվոր՝

«Առավոտ» օրաթերթ» ՍՊԸ

ՊԳՎ N 02Ա004688

Հասցե Երևան, Արշակունյաց պող. 2, 15-րդ հարկ
Հեռ. 568-968, 586-529, e-mail: news@aravot.am

Պատասխանող՝

Շիրակի մարզպետ՝ **Լիդա Նանյան**

Հասցե Շիրակի մարզ, ք. Գյումրի, Գ. Նժդեհի 16

07.10.2009թ.

Հ Ա Յ Ց Ա Դ Ի Մ ՈՒ Մ

Ճանաչման և գործողության կատարման հայց

Շիրակի մարզպետի անգործությունը ոչ իրավաչափ ճանաչելու, որպես հետևանք տեղեկատվություն տրամադրել պարտադրելու և վարչական տույժի ենթարկելու պահանջների մասին

1. Փաստերը որոնց վրա հիմնված է հայցապահանջը.

«Առավոտ» թերթի մարզերի և Սփյուռքի էջի պատասխանատու, լրագրող Արամ Զաքարյանը 19.08.2009թ-ին ՀՀ բոլոր մարզպետներին, այդ թվում Շիրակի մարզպետ Լիդա Նանյանին՝ marzpetaran@shirak.region.am էլ. փոստի հասցեով հետևյալ բովանդակությամբ տեղեկատվություն ստանալու հարցում է ներկայացրել. «Շիրակի մարզպետ Լիդա Նանյանին

ՀԱՐՑՈՒՄ

Հարգելի տիկին Նանյան

Ինչպես հայտնի է՝ սկսած 2005 թվականից, ՀՀ պետական բյուջեով, բացի մարզպետարանների պահպանման ծախսերից, «Այլ նպատակներ բյուջեից» տողով ՀՀ մարզպետարանները գումարներ են ստանում: 2005, 2006, 2007 թվականներին յուրաքանչյուր մարզպետարան ստացել է 10-ական միլիոն դրամ, իսկ 2008 և 2009 թվականներին՝ 20-ական միլիոն:

Խնդրում եմ պատասխանել հետևյալ հարցերին:

Ի՞նչ նպատակներով են ծախսվել այդ գումարները՝ ըստ տարիների:

Խնդրում եմ մանրամասնել՝ ամեն տարի քանի՞ որոշում է կայացվել, ինչքա՞ն գումար է ծախսվել ամեն որոշմամբ:

Կանխավ շնորհակալությամբ՝ «Առավոտ» թերթի մարզերի և Սփյուռքի էջի պատասխանատու Արամ Զաքարյան:

Նշված փաստը հաստատվում է հարցման օրինակով:

Հարցմանը պատասխանել են մարզպետարաններից մեծ մասը, իսկ Շիրակի, Լոռու և

Գեղարքունիքի մարզպետները չեն պատասխանել:

Նշված փաստը հաստատվում է կից ներկայացվող 2 պատասխաններով (բոլոր պատասխանները ներկայացնելու անհրաժեշտություն չկա):

2. Հայցապահանջի իրավական հիմնավորումը

ՀՀ Սահմանադրության՝

- 27 հոդվածի 2-րդ պարբերության համաձայն. *«Յուրաքանչյուր ոք ունի խոսքի ազատության իրավունք, ներառյալ տեղեկություններ և գաղափարներ փնտրելու, ստանալու, տարածելու ազատությունը, տեղեկատվության ցանկացած միջոցով՝ անկախ պետական սահմաններից*

Լրատվամիջոցների և տեղեկատվական այլ միջոցների ազատությունը երաշխավորվում է».

- 27.1 հոդվածի համաձայն. *«Յուրաքանչյուր ոք ունի իր անձնական կամ հասարակական շահերի պաշտպանության նկատառումներով իրավասու պետական և տեղական ինքնակառավարման մարմիններին և պաշտոնատար անձանց դիմումներ կամ առաջարկություններ ներկայացնելու և ողջամիտ ժամկետում պատշաճ պատասխան ստանալու իրավունք»:*

Սահմանադրությամբ երաշխավորված վերը նշված իրավունքներն առարկայանում են նաև՝

- «Զանգվածային լրատվության մասին» ՀՀ օրենքում, որի 3-րդ հոդվածով, որի 1-ին կետի համաձայն՝ զանգվածային լրատվությունը (այսուհետև՝ լրատվություն)՝ անսահմանափակ թվով անձանց համար հասանելի տեղեկատվության տարածումն է, որի հիմնական նպատակն է ապահովել մարդու սահմանադրական իրավունքը՝ ազատորեն, անկախ պետական սահմաններից՝ փնտրելու, ստանալու և տարածելու տեղեկություններ ու գաղափարներ: Նույն օրենքի 4-րդ հոդվածի համաձայն՝ լրագրողն իր մասնագիտական օրինական գործունեության ընթացքում, հանդես է գալիս որպես հասարակական պարտք կատարող անձ:

- «Տեղեկատվության ազատության մասին» ՀՀ օրենքում, որի 1-ին հոդվածի 2-րդ մասի համաձայն. «Նույն օրենքի գործողությունը տարածվում է պետական և տեղական ինքնակառավարման մարմինների, ... վրա»: Նույն օրենքի 6 հոդվածի 1-ին մասի համաձայն. *«Յուրաքանչյուր անձ իրավունք ունի ծանոթանալու իր փնտրած տեղեկությանը (կամ) դա ստանալու նպատակով օրենքով սահմանված կարգով հարցմանը դիմելու տեղեկատվություն տնօրինողին և ստանալու այդ տեղեկությունը»:* Նույն օրենքի 9 հոդվածի 7-րդ մասի 1-ին և 2-րդ կետերի համաձայն հայցվող տեղեկատվությունը պետք է տրամադրվեր 5-օրյա ժամկետում, իսկ 3-րդ կետի համաձայն՝ եթե գրավոր հարցման մեջ նշված տեղեկությունը տրամադրելու համար անհրաժեշտ է կատարել լրացուցիչ աշխատանք, ապա այդ տեղեկությունը դիմողին է տրվում դիմումն ստանալուց հետո՝ 30-օրյա ժամկետում, որի մասին հարցումն ստանալուց հետո՝ 5-օրյա ժամկետում, գրավոր տեղեկացվում է դիմողին՝ նշելով հետաձգման պատճառները և տեղեկությունը տրամադրելու վերջնական ժամկետը:

Ի խախտումն Սահմանադրությամբ ու օրենքով երաշխավորված հայցվորի իրավունքների ու պատասխանողի պարտականության, պատասխանողը չի տրամադրել 19.08.2009թ. հարցմանը պահանջվող տեղեկատվությունը, այն դեպքում, երբ՝ պարտավոր էր տրամադրել:

Վարչական իրավախախտումների վերաբերյալ ՀՀ օրենսգիրքի 189.7. հոդվածը պատասխանատվություն է սահմանում տեղեկություն տալու պարտականությունը չկատարելու համար, որի համաձայն. *«Օրենքով նախատեսված տեղեկությունը պետական եւ տեղական*

ինքնակառավարման մարմինների, պետական հիմնարկների, բյուջեներից ֆինանսավորվող կազմակերպությունների, ինչպես նաև հանրային նշանակության կազմակերպությունների պաշտոնատար անձանց կողմից ապօրինաբար չտրամադրելը՝

առաջացնում է տուգանքի նշանակում՝ սահմանված նվազագույն աշխատավարձի տասնապատիկից մինչև հիսնապատիկի չափով:

Նույն խախտումը, որը կատարվել է կրկին անգամ՝ վարչական տույժի միջոցներ կիրառելուց հետո մեկ տարվա ընթացքում՝

առաջացնում է տուգանքի նշանակում՝ սահմանված նվազագույն աշխատավարձի հիսնապատիկից մինչև հարյուրապատիկի չափով»:

Նույն օրենսգրքի 223 հոդվածի համաձայն՝ առաջին ատյանի դատարանների դատավորները քննում են սույն օրենսգրքի ... 189.7 ... հոդվածներով նախատեսված վարչական իրավախախտումների վերաբերյալ գործերը:

ՀՀ դատական օրենսգրքի 3 հոդվածի 3-րդ մասի 2-րդ կետի ու 4-րդ մասի համաձայն՝ վարչական դատարանն առաջին ատյանի դատարան է:

Գտնում ենք, որ եթե դատարանը գործի քննության ընթացքում հաստատված համարի պատասխանողի կողմից հայցվող տեղեկատվությունը չտրամադրելու փաստը, արդարացի իրավունք ունենք դատարանից հայցել՝ 50.000 դրամի չափով վարչական տույժի ենթարկելու պատասխանողին իր ապօրինի արարքի /անգործության/ համար, որն արտահայտվել է՝ օրենքով սահմանված իր պարտականություններից խուսափելու՝ այն է հայցված տեղեկատվությունը չտրամադրելու արարքով:

Գտնում ենք նաև, որ տեղեկատվություն չտրամադրած պաշտոնատար անձին վարչական պատասխանատվության ենթարկելը այդ փաստը հաստատված համարող դատարանի պարտականությունն է:

Վերոգրյալից ելնելով և ղեկավարվելով ՀՀ վարչական դատավարության օրենսգրքի 11 գլխի պահանջներով՝

Խնդրում են՝

Ոչ իրավաչափ ճանաչել Շիրակի մարզպետ Լիդա Նանյանի անգործությունը, որն արտահայտվել է հարցված տեղեկատվությունը չտրամադրելով և պարտավորեցնել 5-օրյա ժամկետում սպառիչ տեղեկատվություն տալու այն մասին, թե՝ *ինչ նպատակներով են ծախսվել «Այլ նպատակներ բյուջեից» տողով Շիրակի մարզպետարանին 2005, 2006, 2007, 2008 և 2009 թվականներին հատկացված գումարները, ամեն տարի քանի՞ որոշում է կայացվել, ինչքա՞ն գումար է ծախսվել ամեն որոշմամբ:*

Կից ներկայացվում են՝

1. Պետական տուրքի վճարման անդորրագիր.
2. Հայցադիմումը պատասխանողին ուղարկելու մասին ապացույց,
3. Լիազորագիր.
4. Հարցման օրինակը,
5. Պատասխանները:

«Առավոտ» օրաթերթ» ՍՊԸ
տնօրեն՝

Պետրոս Պետրոսյան